



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma :

f Tir Yimyim

tiryimyim@aolima

tir yimyim

TAPAK 3

US sepaitem anizüker arutsü mapang tajung balaka mali: Joe Biden

Assam Congress-i Naiwrita Joy Shukla pelaa agizüker



VOL. XVIII NO. 305 (ADOK 305) DIMAPUR

RASEMNÜ (WEDNESDAY)

LUROI (AUGUST) 18, 2021

₹ 5.00

COVID-19 Nagaland: 79 dak putet, 137 taneptsü angu & 2 asü

Kohima, August 17, 2021 (TYO): Mongulbarnü Nagaland nung COVID-19 agi shiranger nisung 137 taneptsü angu aser 79 dak putet.

"Testüiba ghonda 24 tsüingda COVID-19 puteta alir nisung 137 tashi taneptsü angu. Parnokji Dimapur nung 48, Kohima nung 28, Peren nung 19, Wokha nung 18, Mokokchung nung 12, Tuensang nung 11 aser Mon nung 1 lir" ta Integrated Disease Surveillance Project atema State Nodal Officer, Dr Nyanthung Kikon-i ashi.

Parnok züingsema taneptsü angur nisung 26,738 kumogo aser Nagaland nung Covid-19 nungi taneptsü angur 91.33% lir, ta paisa ashi.

"Tanü nisung 78 dak COVID-19 aliba putet. Parnokji Dimapur nung 50, Mokokchung nung 15, Kohima nung 11 aser Longleng, Peren o Wokha nung kaka (1) lir. Parnok züingsema nisung 29,274 dak putetogo" ta Dr Kikon-isa ashi.

Tang COVID-19 puteta alir nisung 1,088 anepaludar, ta paisa shisem.

Mongulbarnü Dimapur aser

Mokokchung nung COVID-19 puteta alir nisung kaka asü. Tena züingsema tasür ajak agi nisung 607 kumogo saka nisung 14 bo tanga tashidak ajanga asü, ta Dr Kikon-isa shisem.

Tang tashi nung COVID-19 alitsü akok ta temolung melemi bilemba sample 292,426 tendangogo. RT-PCR ajanga 105,049, TrueNat ajanga 71,693 aser Rapid Antigen Test ajanga 115,684 tendang, ta paisa ashi.

"Nagaland nung nisung 640,948 nem COVID-19 vaccine indang dose 812,324 agütsüogo" ta State Immunization Officer, Dr Ritu Thurr-ia ashi.

Parnokji frontline workers 60,838, healthcare workers 15,986, arishi kum 45 ser temapur 189,785 aser arishi kum 18 nungi 44 tsüingda alir 374,337 lir, ta paisa ashi.

"Vaccine agirtem rongnung nisung 171,3784-i dose anaprong agiogo. Parnokji frontline workers 42,211, healthcare workers 12,752, arishi kum 45 ser temapur 108,470 aser arishi kum 18 nungi 44 tsüingda alir 7,945 lir" ta Dr Thurr-isa metetdaksü.

ED-i NSCN (IM) lennirtem indang Rs 6.88 crore sota lir

Guwahati, August 17, 2021 (Agencies): Enforcement Directorate (ED)-i NSCN-IM tongti lennirtem ta temolung melemi bilemba nisung kar indang rongsen sota yuogo.

Parnoki Rayilung Nsarangbe, pa kinungtsü Ruth Chawang aser Apam Muivah nung nung nung nung jangjaogo.

Nsarangbe ya NSCN (IM) nung colonel aser treasurer lir aser Apam Muivah ya Ato Kilonser indang secretary lir.

ED-i Rs 6.88 crore alangba parnok indang bank balances, mutual funds aser insurance products sota lir.

Yaküm December ita National Investigation Agency (NIA)-i chargesheet benokba nung ajemdaker ED-i bushisüingdangtsü tenzük.

Naga telungpur telok NSCN (IM)-i Manipur aser Nagaland nung tashiyim agi sen meshiba

inyakyim tajung ka inyak aser iba ajanga parnoki sorkar sen aika angu.

Manipur nung NSCN (IM)-i gari lenmang yangluba company tem dang nungi ozüingi memelaba 'tax' aika sarutet ta tai tonglokja lir.

Manipur kübok administrative district 4 indang nung NSCN (IM) in-charge-i "collective leadership" treasurer Rayilung Nsarangbe nem osang agütsü ta ED-i metetdaksü.

Parnoki tashiyim agi sen bendenba den osangtem Nsarangbe ket nung agütsü, ta ED-isa ashi.

Sen sarutetba nungi teimba ka "collective leadership" tetuyuba nung amshi aser tanüingbaji Nsarangbe kinungtsü aser Apam Muivah na indang bank account nung ayu.

Nsarangbe-isa Ruth Chawang indang account tem nungi Apam Muivah dangi sen yok ta ED-isa tai tongloktsüogo.

Centre-i North East nem Rs 1300 crore lezmüksü

Guwahati, August 17, 2021 (Agencies): Centre-i Northeast state tem atema COVID package ta ser Rs 1300 crore lezmüksüogo.

"Northeastern state ajak atema Centre sorkari COVID response package ta ser Rs 1300 crore lezmüksüogo" ta Union Health Minister Mansukh Mandaviya-i Guwahati nung ashi.

Mandaviya-i Mongulbarnü Guwahati nung Northeast nungi health minister tem aser

ketdangsurtem den ajurutepa liasü. "NE state tem nungi Health Ministers den wara osang, vaccine agiba aser ECRP-II mapa inyakba meyipa repringshimogo" ta Mandaviya-i ashi.

"North-Eastern region nung state 8 nem Rs 1352.92 crore lezmüksüogo. Centre sorkari maneni yaritsü ta ni parnok dang nangzükogo aser ECRP - II package mapa tuluba inyaksü ayongzükogo" ta paisa metetdaksü.

JCPI-i Gaon Bura(GB) shimba ashishir

Dimapur, August 17, 2021 (TYO): Asür Ghokheto Chopi convenor ser non-Naga ka Gaon Bura(GB) shimba magizüker ta Joint Committee for Pervation of Illegal Immigrants (JCPI)-i nenshia metetdaksüogo.

Iba osang ya RIIN atema

Banuo Commission nem-a agütsüogo. Arrla 371(A) nung lateta aliba ama Naga sobaliba ozüing aser inyakyim nung GB kaji Nagaland state nungi lisopur Naga nung ka asütsüla, ta Media Cell, JCPI-i tanü sangdong ka nung ashi.

Nagaland nung Sustainable Developmental Goals Vision 2030 sayaogo



August 17, 2021 nü Kohima nung Vision 2030 document aser District SDG Localisation & Integration Manual sayaba sentong nung Chief Minister Neiphiu Rio aser tangartem agiba noksa angur.

Kohima, August 17, 2021 (TYO): Mongulbarnü Nagaland sorkari Vision 2030 document aser District SDG Localisation & Integration Manual sayaogo.

Capital Convention Centre, Kohima nung Chief Minister Neiphiu Rio-i 'Nagaland SDG Vision 2030: Leaving No One Behind' sayatsü.

"Nagaland state nung alirtemi timtem melii taküm liyonga aotsü aser libaliro jenjang melenshitsu taginübatem tongtetsü atema Nagaland SDG Vision 2030 ya document ka lir" ta tanü Chief Minister Rio-i ashi.

2015 kum United Nations General Assembly-i Sustainable Development Goals (SDGs) 17 shimba nung ajemdaker document yanglu.

Iba vision document nung Nagaland atema mapang tatsüka, telatet aser talangka nung inyaksüba alizüing balala lir, ta paisa ashi.

"North Eastern State tem aser talisa tenem aliba state temi rongsenketzüng tsütsü linük nung

tanga state tem memener. Nagaland ya senotsü peria manguba state ka lir aser state sorkari capital aser infrastructure development atema sen aika magütsüeteter" ta Rio-isa ashi.

"Nagaland nung Centrally Sponsored Schemes kübok terenlok mapa inyakba, mapa inyaksü mongpu tatsüka dang aüba, ali kibur inyakyim aser tangalen nung osettsüet bener aruba nung sen aika endokba tebilemstüem ajanga Naga nungertimtemer. Iba jagi Centre sorkari North East Hill State tem atema Scheme inyakba nung senotsü agütsüba aser inyakyim balaka latettsü nüngdaker" ta CM Rio-isa metetdaksü.

"Talenba aika liaka Nagaland-i Goal 12 - Sustainable Consumption & Production, Goal 2 - Zero Hunger, Goal 6 - Clean Water and Sanitation, Goal 15 - Life on Land aser tanga maparen atema top performing state ngutetogo. India sorkar aser UNDP-i Nagaland len anitsü

atema bendanga agütsüba telok ka nem mapa lezmüksütsü imlar" ta paisa ashi.

"Asenok ajaki Vision 2030 document nung aliba alizüingtem atongtsü atema külemi inyakdi. Prime Minister'er 'Sabka Saath, Sabka Vikas' yimyim nung ajemdaker asenoki nübortem taküm jenjang ajungketdi" ta Rio-isa ayongzük.

Iba sentong nungsa Planning and Coordination, Land Revenue and Parliamentary Affairs Minister, Neiba Kronu-i 'District SDG Localisation & Integration Manual' sayatsü.

"State ajaki Sustainable Development Goals (SDGs) maparen takok ngua inyak nung dang India-i SDG tongtetsü. Iba mapa ya districts, blocks aser village levels nung inyaksüla" ta NITI Aayog indang SDG Adviser, Sanyukta Samadar-ia ashi.

Iba maparen nung North East Region-i tongti shilem agir, ta laisa ashi.

(Maneni tapak 2 nung...)

PM Modi-i Naga yimten latettsü yongyar: Union MoS Dr Singh

Kohima, August 17, 2021 (TYO): "Centre nung taoba sorkari Naga olemtep anendaka ayu saka Prime Minister Narendra Modi-ibo Naga yimten latetnür" ta Union Minister of State for External Affairs and Education, Dr Rajkumar Ranjan Singh-i ashi.

Mongulbarnü Union MoS Dr Singh-i iba ya osangbener dang ashi.

"Prime Minister Modi-i Naga tebilemstü angatetepnür aser iba jagi pai PM inyaksü tezüngzüktep agiba sülen Naga yimten latettsü atema temolung agütsü aser Framework Agreement sign asütsü atema mapa inyak" ta Dr Singh-i ashi.

Pai Framework Agreement nung aliba ama teletetba tajung ka aginür aser iba Agreement ajanga Northeast aser talisa Nagaland nung yimjung bener arutsü imlar, ta paisa shisem.

Yashi nungi pai Dimapur aser Kohima nung nisung balala aser Naga teloktem den ajurutepdang parnok ajaki tekaratiba nung Naga yimten tebilemstü angatetepnür aginüba lemsatepogo ta Dr Singh-isa metetdaksü.

"North East region nung tangalen nungi aser talisa Bangladesh nungi ozüing alema

aruba tebilemstü khuret ya tulu lir. Iba ya India nüjiso anguba, India-Pakistan lemdangba aser Bangladesh kümetetba nungi ajuruba khuret ka lir" ta Union MoS-isa ashi.

Northeast nung lisopurtem kümdanga maliba ajanga iba ya ataloker aser iba ajanga Northeast nütsüing yongsük nunga kongshio, ta paisa metetdaksü.

Nagaland nung Opposition maliba sorkar atema olen ka lemsatepdang "Modi'er sorkar ya junga ketdangtsü atema lir aser democratic inyakyim ka nung opposition-i nübortem atema mapa tulu inyaker" ta pai ashi.

"Nübortem renlokdaksütsü atema ajak longimbaji junger saka sorkar ketdangtsüba mita repringtsü atema opposition alitsüla" ta Dr Singh-isa shisem.

Dr Singh-i Hombarnü Nagaland tonga aruba sülen tamangba yimsü teloktem, nübo agi tangar memenebpa teloktem aser ano tanga telok aika indang temoatsü agia liasü. Centre aser State tsüingda tesentaktep tajungba kümdaksütsü atema pai telok balala den ajurutep.

"PM Modi-i North East region dak tamang akar aser iba jagi non-Hindi oshi jembir ka nem

Education department ketdangtsütsü lezmüksü. Iba ajanga PM-i North East nug tetsü oshitem den Hindi oshi renlokdaksünüba sayur" ta Union MoS Dr Singh-isa metetdaksü.

Tarutsü lanu putu ajangzüksü atema New Education Policy tenzüksü aser iba ajanga asen linük 'superpower' ka akümtsü, ta paisa shisem.

External Affairs indang jembidang "North East nung hydrocarbon dena ali rongsen aika lir aser bendang linüktem teyari agia bio-resources mapa inyaka rongsenketzüng jenjang ajungkettsü akok" ta Dr Singh-isa ashi.

Delhi nung aliba North Eastern State 8 nungi resident commissioner tem dang bendang linüktem den tesentaktep yanglutsü atema tetuyuba agütsüogo, ta paisa shisem.

North East ajanga China, Myanmar, Bangladesh aser Bhutan den arrtsütepa lir. COVID-19 wara aser Myanmar tensa süngjamba sülen Act East policy tenzüksü aser iba ajanga North East nung ajangzüksü, ta paisa metetdaksü.

ANPSA Dimapur unit ajanga takok angur nem tetushi agütsü



Agriculture Production Commissioner, Y Kikheto Sema aser Deputy Commissioner, Dimapur, Rajesh Soundararajan nati HSLC & HSSLC tatidang nung tematiba jenjang nguteter nem tetushi agütsüba mapang tangokba noksa ka yangi angur.

Dimapur, Luroi/August 17 (TYO): Nagaland Board of School Education ajanga agiba 2021 High School Leaving Certificate aser Higher Secondary School Leaving Certificate tatidang indang osang tawa sangdongba nung tematiba jenjang nguteter timba Dimapur district nungi liasü.

Aser item takok angurtem nem tetushi agütsüba sentong ka All Nagaland Private School Association (ANPSA) Dimapur unit ajanga Holy Cross Higher Secondary School, Dimapur nung August 17, 2021 nü agia liasü.

Tawa sangdongba HSLC & HSSLC examination nung tematiba jenjang (topper) nguteter kaketshir 124 liasü aser item rongnungi nisung 73 bo Dimapur district kisung nungi liasü, koba state nung topper ajak sentepba nungi shilem 59 alitsü.

HSLC nungi topper nisung 80 nungi nisung 43 bo Dimapur nungi liasü, anungji ibai state nung topper angur shilem 53.75 alitsü.

HSSLC nung topper 40 rongnungi nisung 30 Dimapur nungi liasü, koba state nung iba jenjang nguteter shilem 68 alitsü.

Iba sentong nung jembiba mapang Agriculture Production Commissioner, Y Kikheto Sema i takok angur nem tenüngsang agütsü aser bendanga agütsür meranga azüngba/inyakba ajanga nenok ajak nem tenüngsang agütsütsü yangi adenshi, ta ashi.

State topper rongnung Dimapur district nungi timba aliba ngua pela bilemer, ta pai ashi.

Dimapur ya Nagaland indang süngkum aser shishilempaba tesep ka ama züngshir. Saka Dimapur district nungi iba ama takok tajung ngutetba yong Nagaland state nung Dimapur ya private school tajungtiba, tesayur tajungtiba, tsürabur tajungtiba aser kaketshir tajungtiba aliba tesem ka ta züngshitsü akok, ta pai ashi.

Pai Dimapur nung aliba nüburttem aser private school tem

dang maneni mapa tajung inyaksü ajungshia liasü.

Pai kaketshir ajunga dang Tsüngrem tsübutüsü aser Pa sülen anidaksü; tesayur aser tsüraburtem akumtsübutüsü aser Tsüngrem matsüngdang aser nisung matsüngdang ajemalutsü ayongzüka liasü.

Iba sentong nung Deputy Commissioner, Dimapur, Rajesh Soundararajan-ia takok angur ajunga nem tenüngsang agütsü aser ibai bendanga agütsür meranga azüngba temaitsü lir, ta ashi.

District asoshi ibai nüma atangtsü mapang ka lir, kechiaser state nungi topper timba Dimapur district nungi lir, ta pai ashi.

Pai school establishment, tsürabur aser tesayurtemi iba ama kaketshir tajung anitetba atema pelaba lemsatepa liasü.

Paisa kaketshirtem dang sübo-süyima melie pei shimtetba wadang nung tajungtiba akumtsüsa meranga inyaksü ayongzüka liasü.

Mkg nung Smoke Free District Headquarter Campaign tenzük



Dimapur, Luroi/August 17 (TYO): National Tobacco Control Programme (NTCP) mapatong kübok Mokokchung district nung Smoke Free District Headquarters Campaign sentong ka Deputy Commissioner Mokokchung, Limawabang Jamir-i Deputy Commissioner kidang tenzüksü, kong District Nodal Officer NTCP, Mokokchung, Dr. Taliwaba Ao, IMDH nungi Dental Doctor tem aser Run Mokokchung telok dena liasü.

Chief Medical Officer Office nungi sangdong ka ajanga ashiba agi, iba sentong nung mendenpuba, Consultant NTCP, Mokokchung, Nukshiwati Longchar ajanga nüburttem amshiba tesemtem nung moko achiba nokdangtsü

aser 'second-hand smoke' ajanga moko machirtem, talisa tetsür aser tanurtem temang nung timtem agütsüba indang iba sentong tenzükba indang rateta ashi

Pai nüburttem amshiba tesemtem nung poster campaign ajanga nüburttem nem moko achiba ajanga timtem agütsüba angatetdaktsütsü asoshi tongtipang süa lemsatep.

Ajidang masü lokti tentet balala ajanga awareness campaign katsütsü sentongtem aser Mokokchung jila nung COPTA 2003 indang Section 4 aser 6 benoktsüba indang ashi.

Deputy Commissioner aser Chairman, District Level Coordination Committee (DLCC), Mokokchung,

Limawabang Jamir ajanga iba sentong ayongzüka pela agizük aser nüburttem alidak moko achiba ya tanü asen lokti nung teblemtsü tulu lir, ta ashi.

Iba campaign ya district nung akang-akanga benoka amshitsü, talisa sorkar indang office, bank aser nüburttem anisüngzüka tesemtem kata mezüdoki iba ozüng benoka amshitsü, ta pai ashi.

Run Mokokchung telok nungi lanurtem arua dena aliba aser temang anema alitsü tejangraba ngua pai parnok dang maneni kasa mapa inyaksü ayongzüka liasü.

Iba rara ya talang lir saka campaign balala ajanga tajangzük angutsü, ta Deputy Commissioner, Mokokchung ajanga ashi.

Governor-i Hunapongpi benjong salem aben

Dimapur, Luroi/August 17 (TYO): Nagaland nung aliba nüburttem aser talisa Sangtam nunger adianu aser adianutsürtem den Hunapongpi benjong salem lemsateper, ta Nagaland Governor, R. N. Ravi ajanga sangdong ka nung ashi.

Kati ka dang temeim sayuba temaitsü iba Hunapongpi benjong ya amunger. Iba benjong nung tanurtemi tongti shilem agir, kong parnoki sobaliba yimyatem, talisa ken, tsüngsang aser saisapong angazüker.

Iba benjong ya ajanga akhi tangatetba shisatsü angazüksü maongka agütsür.

COVID-19 tashidak wara nungi jenbutüsü meratem agia iba tebour tajung benjong mungti

ta ayongzüker, ta Governor Ravi-i ashi.

N S C N / G P R N (Reformation) ajanga Sangtam nunger den Hunapongpi benjong salem lemsatepa liasü, koba August ita tiyonglen (August 18 meta) amunger.

Iba benjong nung Sangtam kin indang sobalibaliru tebour tajung sayur aser kasa mapang tesunep yimjung nung nüburttem meimtepa aliba sayur.

Sangtam nunger adianu aser adianutsürtem maneni yimchi-yimjung, temoatsü aser telungjem nung Naga nunger asoshi tatifshitsü tajung ka ama lidakjang ta moatsür, ta NSCN/GPRN (Reformation) indang MIP (Ministry of Information & Publicity) sangdong ka ajanga ashi.

Vision Trinity Club ajanga yimtsüng pongu nem teyari agütsü



Kohima, Luroi/August 17 (TYO): Vision Trinity Club ajanga August 17, 2021 nü 'Reach Out' sentong ka ayongzüka Southern Angami kübok yimtsüng pongu nung kakets aser mask lema agüja liasü.

Tang tensa nung yimdak yimtsüngtem nung aliba kaketshirtemi kakets aser nüngdakba resources peria

monguteti aliba ajiteta iba Club indang tir Nunese Sale, shiba SASU indang speaker lir, pai anir Club ajanga Pfuchama, Khuzama, Kigwema, Phesama aser Sakhabama yimtsüngtem semdanga kakets 200 den mask 500 agüja liasü.

Kakets 200 nungya otsü kakets, general knowledge aser reference book balala lir.

Kohima DTF ajanga COVID osang prokshiba maparen tembangogo

Dimapur, Luroi/August 17 (TYO): Kohima District Task Force (DTF) ajanga nüburttemi jembiba oshi nung COVID-19 indang osang balala prokshiba maparen August 17, 2021 nü tembanga Deputy Commissioner, Kohima, Gregory Thejawelie, NCS ajanga Nagamese Brochure ka saya, koba social media platform nung soft copy angutsü.

Kohima DTF-i IECC

Committee ajanga COVID-19 tashidak indang osang balala ya Tenyidie aser Rengma oshi nung adoka liasü, kong tanü tashi COVID-19 tashidak dak sendakba osangtem ajunga ayimjema zülua lir.

DTF ajanga Tenyidie aser Rengma oshi nung iba brochure ya copy 5,000 menüngogo aser nüburttem nem village council aser arogo ajanga lemtsüogo.

Nagaland nung Sustainable...

(TAPAK 1 NUNGI...)

"Nagaland sorkari SDG Vision 2030 document adokba atema tenüngsang agütsür aser Steering Committee den Planning Department-i anir department tem amalitepa inyakba ajanga taruba kümtem state jenjang tajungba akümstü imlar" ta Sanyukta-isa ashi.

Ministry of DoNER aser NITI Aayog ajanga NE State 8 nung district 120 atema SDG index yangluogo aser ibaji August 25, 2021 nü tenzüksü, ta laisa shisem.

Ministry of DoNERi iba index amshia senotsü lemsütsüba, tongtipang tesemtem nung temolung agütsüba maparen inyaksü. Anungji state sorkari NITI Aayog ajanga poverty index

yangluba amshitsü mepishir, ta Sanyukta-isa metetdaktsü.

India nung SDG performance tarensen nung Nagaland jenjang 19 nung lir aser North East nung jenjang 5 nung lir.

Nagaland kübok SDG junga inyakba district tajungtibaji Kohima lir aser tamajungtibaji Kiphire lir.

Iba sentong nung Chief Secretary & Development Commissioner J. Alam-i tesentepertem pelaa agizük. Sentong tembangba sülen SDG Coordination Centre, Planning & Coordination Department Nagaland-i SDG India Index 2020-21 and Multidimensional Poverty Index indang state-level workshop ka agi.

Assam Congress-i Naiwrita Joy Shukla pelaa agizüker; Sushmita Dev melenzüksü



Guwahati, August 17, 2021 (Agencies): Mongulbarnü Assam Congress-i Naiwrita Joy Shukla party nung aniokogo. Barak Valley nung Sushmita Dev melenzüksü atema Naiwrita shimogo. Naiwrita Joy Shukla ta Karimganj constituency nungi taoba Congress MP Lalit Mohan Suklabaidya'er jala lir.

"Barak Valley jala Naiwrita Joy Shukla ozü party nung pelaa agizüker" ta Assam Congress president, Bhupen Borah-i ashi. Lai teti Congress party nung züngsem kümnüa liasü aser iba jagi Bhupen Borah dang ashi ta Naiwrita-i metetdaksü. Assam Congress president Bhupen Borah-ia anogo 15

tsüngda Sushmita Dev melenzüksü atema nübo ka bener arutsü ta shia liasü. Hombarnü Sushmita Dev-i Kolkata nung TMC lennirtem Abhishek Banerjee aser Derek O'Brien na lia TMC nung aden. Sushmita Dev-i Congress yutsüba atema Kapil Sibal-i anir Congress lennir aikati aoksaba metetdaksüogo.

Manipur sorkari activist Erendro nem temenok agütsütsü memolunger

Guwahati, August 17, 2021 (Agencies): Manipur nuing activist Leichombam Erendro tepuokdak ayuba atema temenok magütsütsü ta state sorkari shiogo. Facebook nung ashishitep aliba olen post asüba atema pa ya National Security Act (NSA) kübok pur tepuokdak yua liasü. Pa ya mapang shia ozüing alema inyaker ka aser tensa süngjemdaksütsü atema pa aputsüsa aküm ta Manipur sorkari Supreme Court nung affidavit benokogo. Supreme Court-i chiochtsü tetuyuba agütsüba sülen

Erendro ya July ita Manipur Central Jail nungi chioka liasü. Manipur BJP president S Tikendra Singh Covid-19 ajanga asüba dak sendakba nung ashishitep olen jembiba atema May 13 nü Erendro den journalist Kishorchandra Wangkhem na apu. Erendro tebu par jabaso NSA kübok tepuokdak ayuba atema sorkari temenok agütsütsüla ta ken o benokba atema Manipur sorkari iba telangzüba agütsü. Erendro ya lanur social activist ka lir aser social media nung pa sülen anidaker aika lir

aser iba jagi pa ya "celebrity" jenjang nung lir, ta affidavit nung shia lir. "Iba nung tebilemba tamajung kecha mali. Facebook nung post asüba mapang tensa azüoktsü atema pa aputsü tetuyuba agütsü. Pa tepuokdak ayudang timtem kecha magütsü anungki pa nem temenok agütsütsü madoker" ta Manipur sorkarisa affidavit nung shia lir. Justice DY Chandrachud aser Justice MR Shah na adenba bench-i affidavit agizükogo aser August 23 nü angadangtsü ta metetdaksüogo.

Tripura nung arasener ka tepsetba atema nisung 10 apu

Agartala, August 17, 2021 (Agencies): Tripura nung nisung kati arasener mapa inyak ta temolung malemba agi taoba hopta tepset aser iba nisung tepseter nisung 10 tashi Tripura Police-i puogo. Iba lendong ya taoba hopta Unokoti district kübok Samrupar nung atalok. Yimdaklir nisung 200 temai Bullu Orang dak züka merenshi aser pa asüba sülen parnokki pa indang mang arem. Bullu Orang-i arasenerba mapa inyakba ajanga nisung ana temang mejungi aküm ta

yimdaklirtemi temolung meleme bilem ta police-i ashi. Bullu kinungtsüi FIR ka benokba sülen police-i ken o benoka bushisüngdangtsü tenzüka liasü. Süngolu nung mapa inyaker nisung 200 temai pa kidang nungi kima atsüker zükset aser iba sülen yimdaklirtemi parnok sasa police ket nung bendanga agütsü. Police-i pa indang tasü mang ali nungi tutetogo aser post mortem asütsü atema bener yokogo.

Dibrugarh nung 'power cuts' atema AASU-i lungkak ait



AASU züngsemtemi Dibrugarh district nung Assam Power Distribution Corporation Limited (APDCL) indang office tem lungkak aitba noksa nung angur.

Dibrugarh, August 17, 2021 (Agencies): Mongulbarnü All Assam Students' Union (AASU) züngsemtemi Dibrugarh district nung Assam Power Distribution Corporation Limited (APDCL) indang office tem lungkak ait. APDCL-i 'power cuts' kanga asüba yong AASU züngsemtemi tejashi sayua Dibrugarh, Naharkatia, Duliajan aser Tingkhong yimdong sema lungkak ait aser iba sülen APDCL indang office temi ao. AASU indang Dibrugarh unit president Rupjyoti Borthakur-i anir züngsemtemi APDCL sub-divisional engineer indang office nung oa lungkak ait.

AASU züngsemtemi Assam nung BJP sorkar anema yimyim ayim aser BJP sorkari Assam nung 24x7 power supply agütsütsü nangzükba nenshia metetdaksü. Iba sülen parnokki sub-divisional engineer nem state power minister Bimal Borah dangi züluba shidi ka agütsü. "Tzüngluruwa power cuts kanga asüba ajanga nübertem timtemer. Iba ajanga kaketshirtemi timtem tuluba ajurur kechiyong parnok tatsük nung lesson mebushiteteter. BJP sorkari 24x7 power supply agütsütsü nangzükba onoki bilemtetdaksür. Sorkari nangzükba ama inyaksüla" ta Rupjyoti Borthakur-i ashi.

GOVERNMENT OF NAGALAND DIRECTORATE OF TECHNICAL EDUCATION NAGALAND: KOHIMA NOTIFICATION NO. DTE/ ESTT-2/02/2020-21/ This is to inform that the NSEE-2021 Merit list has been declared and uploaded in the Department Website: www.dtenagaland.org.in and the same can be seen in the Office Notice Board. Sd/- (Nungsangmenlal mchen) Ex-Officio Director. Issued by DIPR



Assam Rifles-i Mizoram nung Heroin gram 119.6 aser foreign cigarettes case 82 ngutetogo. Osang tejangja ka angazükba sülen Assam Rifles aser Customs Department ketdangsurtemi Zokhawthar tesem mita aodang Rs. 47, 84,000 jenjang heroin apu. Ano Chhungte tesem nunga parnokki mita aodang Rs. 1,06,60000 jenjang foreign cigarettes apu. (Aizawl, August 17)

Assam: Covid19 vaccine agir aliba passenger metendangtsü

Guwahati, August 17, 2021 (Agencies): Tangalen nungi Assam-i arur ajak dak airports, railway stations aser road border points nung Covid19 metendangtsü ta sorkari Mongulbarnü metetdaksüogo. "Assam nung COVID-19 prokshiba azüoktsü atema airports, railway stations aser roads nung tangalen nungi arurtem kanga junga tendanger. Assam aser linük nung Covid19 positivity ajema akümer" ta health & family welfare department principal secretary, Anurag Goel-i ashi. Linük nung ghonda 24 tsüngda Covid testing reports angutsüsa testing facility

lapoka lir aser ibaji jangjatsü atema ICMR portal nung osang lir, ta paisa ashi. "Anungji COVID-19 vaccine indang dose anaprong agirtem aser certificate alirtemi airports, railway stations, road border points nung screening ketdangsur dang sayura metendangtsü. Yamaji mesüra, tangalen nungi arurtemi Assam-i marudang ghonda 72 tsüngda agiba negative COVID test report abentsüla" ta pai metetdaksü. Ajisüaka, shirangba yimya alirtemi pei sasa sen agütsür Assam nung airports aser railway stations nung RT-PCR test asütsü, ta principal secretary-isa metetdaksü.



TIR YIMYIM YIMOBILEM (EDITORIAL)

DIMAPUR RASEMNÜ, LUROI(AUGUST) 18, 2021

Afghan nunger o Naga nunger na !

Afghanistan nung meimlaika anogo 40 shi tsungda nung America nunger tashi aser teyari ajanga kumdaktsüba government makdoker Taliban teloki yimsüsüsü tenzükba ya asenok aika asoshi taoksatsü aser temulung ashitsü osang ka lir. Afghan nungertem den asenok kecha agia sendaktepa mali saka Taliban ta asüdang, asenok melalai akümer, kechiyong Taliban telok ya Muslim nunger kiralongrar telok ta asenoki meteta lir. Taliban teloki alima nung kiralongraba mapa inyakba dang masü saka par lima nung par nisungtem danga mapayui inyaker. Parnoki tetsürtem sü agi tekolak aser tejak nembanger külena yimdong nung kija senzüsü memelar, parnokji kinunger tebur kati meiner senzüsüla aser tetsürtem kaketrejui aotsü aser tangalen mapa inyaksü memeler, anungji Taliban yimten yimsüsüba kübok tetsürtembo alar amai akümer. Atangji, tangbo parnokji item ozüngtemji salatsüsü ta metetdaktsüogo saka mapangi dang ashitsü. Atangji, asenok asoshi dang masü saka US asoshia par sepaitem Afghan lima nungi meyipa anir arutsü tenzük metenzük ka, Taliban teloki hopta pongo nung Afghanistan agiadokbaji tesümgangtsüka lir. 2020 küm February ita nung Taliban telok den US tir Trump administration-i yimjung ken o lemtetba mapang, Afghanistan nungi US sepaitem 2021 küm May ita tashi nungbo meyipa anir aotsü tenangzüktepba agia liasü saka tir tasenba Joe Biden-i ita asem atsülang aser tan August ita tashi nung US sepaitem ajak Afghanistan nungi agientsü sentong tenzükür külen, parnok moumadangyongi Taliban teloki Afghanistan yimten yimli tanaben meyipa agir. Atangji, 2020 küm February nung yimjung ken o renema alinungji, tangbo Taliban telokji US asoshi tsükchir masü saka parnokji toktsüba sülen Ashraf Ghan-i aniba Afghan government o Taliban telok na tangatettep nung longjemer Afghanistan government tasen ka akümtsü US-i bilem südi saka manger sangwa nung sen dang tayimtsü sünga oshir Afghan tir Ashraf Ghan jena oa adok aser Afghnistan yimtiba Kabul yimtibo injang kata mekhadoki Taliban teloki ayimayima agia adok. Taoba küm 20 America nunger sen aser America nunger nübo agi Afghanistan nunger yimsüsür aser sepaitem anitetsü merangogo saka Afghan nger yimsüsür aser sepai tanishirtem rongnung ochimashi ulura liasü. Parnoki America nungertemi agütsüba sen agi mapa shitak inyak angazüksü aser pei nübertem mulung koka anisüngzüka lidaktsüsü asoshi inyak masü saka yimsüsürtemi pei kibong dang takar akümtsü merang aser sepai tanishirtemia sepaitem nem agütsüsü lemzüksüba senotsü shitak magütsüi parnok agiadok. Ibayongji, aiben sepaitema dena tebok sünga mechiyongdaktsütet timtemdaktsü. Aji oda, sepai tanishirtemi sen agizüka agitsü asoshi tiyazü sepai tenüng aika enoka amshi aser parnok tenüng nung sen agizüka agi. Iba ama tanishirtemi timtemdaktsüba agi Afghan sepaitemi Taliban anema raratsü melen Taliban arutsüang yongyaa liasü südi. Atangji, America nunger Afghanistan-i arubaji talitsü aru masü saka Taliban teloki yimsüsüba mapang Al-Qaeda lenir Osama bin Laden Afghanistan nung jenokdaktsür ta temulung meleme bilemba agi, Afghanistan amak aser Taliban atsüngdoker Afghan nunger tanger nem yimsü sädaktsü. Ajisüaka, Osama bin Laden Afghanistan mali asü. Iba mechi America nunger sen dollar trillion 2 dak tali endokogo aser US-i aniba sepaitem 3500 tashi taküm sama. Item asürtem rongnung US sepai kija 1600 shi lir aser US sepai meyrirjang 20 dak tali yiruogo. Iba tashiji America nungertemi Afghanistan lima Taliban aser Al Qaeda ama kiralongrar teloktem ket nungi kümzüka ayutsü atema küm 20 tashi bendanga agüja inyakba mapang, Afghan yimten yimsüsür aser sepai tanishirtemi nübertemi parnok dak temulung alemtsüsa meinyaktetba tamakok nungji asenoka lesson tuluka angazüksüla lir. Aji oda, Afghan yimten yimsüsürtemi pei agitsü rongsen dang bilema melii nübertem taküm jengang tajungba kumdaktsüsü bilema inyak asübo, Taliban teloki Afghanistan among adena maitettla. Iba kasaji Afghan sepai tanishirtemi pei sepaitem dang pei tetsü taso lima kiralongrartem ket nungi kümzüka ayutsü tangatetba tajung agüja, temeim agi ochishia parnok nungdak ajak shitak agüja anepalu asübo, Afghan sepaitemi pei taküma mapayui Taliban den rarala. Tangbo yimsüsürtema ochimashi agi chuba ki ama yangluba kidang melitetsüsa jenogo aser sepai tanishirtema Taliban lar amato kümogo. Item tiaji bilemdang, asenok Nagaland nung alirtema India government-i agütsüba sen agi mapa meinyak, nübertem nema magütsü aser tiyazü ita sen aser allowance agi pei semchir semnur tashi agitsüsa rongsenbo benden saka pei limabo mekümzükter ta talidaka maka kumadoktsü ana nung lir.

OLEMSABANG

COVID-19 wara dak sendakba nung tongtipang temetetsü kar

Tekaratiba nung Test asütsüla aser temang anepaluadoktsüla

Na kodang Covid tashidak mesüka symptoms kar danga lidir- Tamasabo yimra aki adong ama dang asütsü, aketsü, tangu sashidang timtemtsü, Anungji tekeratiba nung test sua adoktsüla.

Na test asünung ang positive potetra Doctor aser Nurse temi ne nem mozu agutsüsü. Na positive sür nung test mesüi dang lira na ajanga covid tashidak prokshitsü aser temang nung timtem tali ajurutsü akok.

Asenok Mokochung sasep nunga Covid hospital nung nisung sudar. Ibai aikati menur hospital bushibayong takum samar. Symptoms to develop asüyonga tetsübo, zübazülemba aser test mesüner kidang shiranga kazür koda masü akümdang hospital bushir. Idangjibo kanga menua doker alir. SPO2 (oxygen saturation) noklang nung tukur pezü shilem (94%) dak tekübokba dang kümer hospital bushir anungji timba ka mekümzükter.

Covid symptoms lir test masü kazüdang kinunger, kiyonger dak menashia aotsü aser iba wara ya na ajanga talangba atsülangtsü.

Na covid vaccine agir aliyonga covid tashidak menatsü aser tangar nema menaloktsüsü anungji na vaccine agir liaka test asütsüji kanga dang tongtipang aser Covid dak sendakba libaliru yimyatem ((covid appropriate behaviours) amshitsüla.

Contact Tracing

Na test sür Covid positive potetnung contact tracing teami na anogo pezünü pungonü tsungda shiba sa ajuru ta asündanger tenüng aser contact no meshitsü. nai parnokji asüngdangbatem pokjipoka shiang. Nai meimshia ayudang contacts tem positive asünungbo parnokji tangar dak menaloktsüsü

Na contact tracing nung tensem nungbo tashi anga isolate süa atar test asutsüla.

contact tracing teami ashiba mangai na covid positive sür nung test mesüi tang lira na ajanga tangar nem menaloktsüsü

Tashidak tamajungba akumba

COV-2 indang Delta variant ya tesashi variant lir. Delta variant agi tongaka shirangba kanga bo malitsü akok. Delta variant agi shirangba yimya temji- anogo anunu (2 days) temang tera metatsü, yimra agi adonger ama asütsü aser anogo anünü lir (after 2 days) shirangji anentsü akok. Iba sülen kar anebadoktsü mesera kar talila shirangtsü akok. Shirangba yimyatem yamai alitsü-temang metatsü, aketsü, terok ashitsü, temang nguyangoshitsü, tokolak menutsü, tashi maittsü, tepok aotsü, sakttsüsü, kecha memenemtetsü aser chiyongtsü achiyonga taste kecha malitsü.

Nisung ka kodang tashi agi shirangtir tango sashiba minute ka nung rate 30 mesera tema akumtsü aser SPO2 ajema adoktsü.

Pei kidang oxygen saturation SPO2 koda repringtsü

Shirang tenzükür SPO2 ya normal alitsü. saka kodang tashi agi shirangdir SPO2 tajemba akumtsü.

Covid positive puteter kidang among nung (home isolation) pulse oximeter kidang akatsü tim. Kidang Oximeter mekara anasatiba health centre nung tongtepratepang. Mokochung Municipal area nung alirtembo Mokochung Town Baptist Arogo (MTBA) nungia pulse oximeter ken atema amshitsü angutsü.

Temang nung oxygen saturation spo2 normal rate ya noklang nung tukur pungo shilem (95%) dak tema. SPO2 rate ya 94% tema nung lira home isolation sütetsü mesera covid care center nung mongtetsü. SPO2 rate 94% nungi tajemba lira tekeraba nung Covid hospital bushiang.

Covid positive tem kidang alidang(home isolation) anogo nung pezuben (4) nungi terokben (6) bo sa SPO2 rate tendanga alitsüla.

Co-morbid tem anepalutsü yim

Co-morbid ya diabetes,highblood pressure, cancer, TB, Asthma, allergy, stroke, temulungjang tashidak aser tanga tejen tashidak agi shiranga alirtem dang ajar. Parnok ya covid symptoms adokra tekeraba nung hospital bushitsüla.

Covid vaccine agitsüji kanga tongtipang

Covid vaccine agir aliyonga covid wara aki atongtsü koka lir . Tangar nem menaloktsüsü akok. Saka na covid vaccine agir lira covid tashidak agi menebaka tashi aki meshirangtsü aser tasuba nungia kumzüksü akok. vaccine magi covid agi tashi agi shirangatokra taneptsü nguaka temang nung timtem adokba ajanga akhi libalirua aliba yimya dangi shilangtsu tasak asütsü. Vaccine ya angati angutsü aser jinjang talang lir saka taküm samaba jengangji kanga dang tulu.

Anungji Covid-19 wara ya asenoki zübazüba magitsüla. Kechi teinyaktsü lemsaogo asenok ajaki temulung agütsüa inyaksüla.

- Department of Health and Family Welfare,
Mokochung, Nagaland

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger agateta agitsü mepishir

Egypt nung Aso 6buba mapang aliba Khristan jila ka nguogo



Egypt kübok Mariout awatsüing anasa akhidang Khristantem aliba jila ka nung parnoki yangluba kiojen ka noksa nung angur.

Cairo, August 17 (Agencies): Poland nunger research agirtemi akhidang Aso 6buba mapang Egypt nung aliba Marea yimti nung Khristan jila ka aliba ngutetogo.

Khristan jilaji Alexandria yimti nungi kilometer 40 shi pilar aliba Mariout awatsüing anasa angu. Iba tesem anasaji tang Hawwariya yim lir.

Archaeologist temi ashiba agi, iba jila nungji akhidang Khristantemi temeshi aini Abu Mena aser St. Mena-i aodang amshiba building tejen ka lir. Aso 3-4 mapang nung Khristantem reshikangshiba mapang nung Mena-i Khrista atema taküm bendanga agüja liasü.

Abu Mena World Heritage site ya akhidang Khristan jila nungjagi kilometer 17 shi dang pilar lir aser tanübo yangji monastery-a ka lir. Akhidang temeshi aini aoertem Alexandria-i aoba sülen awatsüing ajanga Marea-i ao, aser tesüsa Abu Mena semdang asütsüa akok. Akhidang Khristantem aliba jilaji acre 33 nung liasü.

Poland nunger archaeologist, Mariusz Gwiazda-i, tang iba jila

ngutetba ajanga akhidang Marea yimti indang taliba angateter, ta metetdaksü. Iba yimti ya Alexander the Great-i 332 BC mapang Egypt agiba sülen tenteta liasü.

Khristan jilaji asalentong tajung yanglur amenokba liasü. Jila nungji Tenla ki-a ka, tzü chigoba tesem ana, nübur metsümeshiba tesem pongu aser kilentzü aodak liasü.

Antiquity-i ashiba agi, mori chipotem nung zülua alibatemi ajanga par mapang nung nosokomeion (hospital)-a ka aliba jangjar.

Iba jila nung yimti lenmangtemji tindang liasü, lenmang tip anatsülan kiojen liasü aser nisungi yangluba tzübu liasü.

Marea ya industrial center aser port ka liasü aser iba yimti Alexander the Great asüba sülen Hellenistic, Roman, Byzantine aser Islamic putu mapang liasü. Aso 7buba mapang nung Muslim nungeri Abu Mena pilgrimage site ji raksatsü.

Poland nunger archaeologist-isa, iba jilaji Rome nunger tsükmenatsü lu ka nung yanglu ama reprangteter, ta metetdaksü.

Tenla kiji tamalen aliba Tenla ki aliba tesem nung yanglu, aser iba Tenla kiji yi yanglutsü atema amshitsü mori chipotem yangluba workshop ka nung yanglu ama reprangteter, ta Antiquity-i metetdaksü.

Poland nunger archaeologist temji University of Warsaw's Polish Center of Mediterranean Archaeology nungi lir. Parnoki tanü-asüing technology amshiba iba tesem nungji bushisüingdang mapa inyaka liasü, ta Antiquity & Ancient Origins-i metetdaksü.

Egyptologist aser Antiquities Museum of Bibliotheca Alexandrina nung Director, Hussein Abdel Basiri, tang ngutetba jila nungji Greek, Roman aser Byzantine civilization liasü ta bushitetogo, ta metetdaksü.

Puti otsü mongin aser Egyptologist, Bassam al-Shamaa-i, tang iba jila ngutetba ya kanga tongtibang, kechiyong iba ya ajanga Egypt indang taliba jangjatsü, ta ashi.

Shamaa-isa, "Asenoki akhidang Egypt nunger libaliro indang ano aika memetet, aser iba indangji taliba metettsü onoki jangrar," ta shisem.

ANO GO ABEN TSÜNGREM DEN

Tetendangba aruba tajangzük

"Kü adianutem, kodang nenoki tatidang aika angur, nenok tamang atitangba agi taremszük adokdaksür, ta meteta aji kanga tepelatsü ta züingshiang." Yakob 1:2-3

Yaküm school ajak shibanger külen, online class aser ano yimya tasen balala ajanga kaketshirtem ajak angazüktsü asoshi asameyang balala ajanga tongtepa aruogo. Iba mapang nung tesayur, tsürabur aser kaketshir ajak atema tebilemtsü tulu ka asübaji, tanurtemi kecha angazük mangazük ar koda tendangtsü ta asüba khuret ya liasü. Tendangba jagiang küm songtema tesayubatem to tajangzük ali maliji metettsüba liasü. Yakobi ashir, tatidang aser tetendangba balala arubaji temelabo masü. Khen khenbo aji kanga sa tashi. Nüktzü sünga liaka, iba ajangaji asenoki iba ajanga ya Tsüngremi kechi nükjidong ka atalokdaksünürba ta shisadangba mapang süang ta ashir. Tasen lai nung tekangshiba asem indang mapang shia jembir aser aji-pei tamang atema rishikangshiba, temang nung mokokmin aser tashitak agi shirangba, aser sensak tia ajanga kangshiba lir.

Item ajak madak koktettsü tashiji tanga agimasü saka, Tsüngrem tsüingdang tsüingchir süa aliba agi dang koktettsü. Shiri iba amala tetendangba ajurudanga lir, parnoki ang koma tasak mesüra iba ajanga parnok koda melenshi aji shitettsü. Iba ajanga parnok shisatsü süngjemshidaksüba, shisatsü renlok daksüba mesüra iba ajangam taküm nung kechi tongtibang aser kechibo mapang laluba ajakji kuli sütettsü. Atangji, iba mapang ya asenok asoshi tepelatsü ta züingshitsüji tasak saka ya amajokbo masü.

SARASADEM

Yihova Tsüngrem, Ne sentong ni nagatettsü atema iba mapang ya ni shisatsü aser taremszük nüngdaker. Ni yariangma. Amen

ICC-i Afghanistan nung Khristantem atema sarasademtsü ayongzüker

August 17, 2021: Tawa Taliban teloki Afghanistan linük agiba sülen iba linük nung Khristantem tarutsü tia tamajungba akümtsü, ta bilema Khristan organization kati iba linük nung Khristantem atema sarasademjang, ta mepishia metetdaksü.

US sepaitemi Afghanistan toktsür aoba sülen Amongnü Taliban teloki Afghanistan yimtiba Kabul agiogo. US Tir Joe Biden-i September ita tashi nungbo sepaia ajak anir arutsü tuyuogo.

Tang Afghanistan nung Khristan nütsüing kwi aliar mejangja, ajisüaka International Christian Concern (ICC)-i ashiba agi, iba linük nung Khristan 10,000 nungi 12,000 tsüingda lir.

Iba linük nung Khristan timbaka Islam yimsü toktsür



2018 küm Afghanistan nungi India-i jena aruba Khristan kibong ka noksa nung angur. Afghan Embassy-i ashiba agi, tang Delhi nung Afghanistan nunger refugee 30,000 shi lir.

Khristan yimsü ajizükertem lir, aser ibaji ajanga Taliban teloki Khristantem anema inyaker.

Taliban ozüing kübok Khristan yimsü dangi meyipertem nem tasüba temerenshi agütsür.

ICC-i, "Afghanistan nung Khristantemi tetsübu nem mekokdaksütsü atema parnok atema sarasademjang ta onoki mepishir," ta metetdaksü.

Osang angazükba agi, Taliban teloki shidi ka ajanga

Afghanistan nung house tamajungtiba linük 50 church network lenirtem dang rongnung Afghanistan ya "nenok kong alia aser nenoki tanabuba jenjang nung lir.

kechi inyakerar onoki meteta lir," ta shiogo.

ICC den jembidang Taliban-i Afghanistan linük Afghanistan nung Khristan tesem tilaka dang azüoka liasü kati, "Ni ama Islam yimsü saka tangbo iba linük tesem toktsür Khristan yimsü ajak Taliban tashi kübok agizüker ajaki temerenshi aitogo.

kechi angutsüar meteta lir. SEND Relief of the Parnoki anogo asemnü Southern Baptist Convention agütsütsü aser tanaben Islam Tir, Bryant Wright-i twitter yimsü dangi memeyipra taochi ajanga, "Afghanistan nung mesayutsü," ta metetdaksü. Khrista tenyaba mapa angar

Aiben Khristantemi Khristantem atema Afghanistan toktsür ajentsüsa sarasademjang," ta akümer mesüra lendong ajurur, metetdaksü.

"Ozü sorkari parnok (Khristantem) mebiletet ama reprangteter. Yisu asoshi alidang parnok nem tashi aser reshikangshia liasü. Open Doors-i ashiba agi, tang alima asenoki sarasademtsüdi," ta nung Khristantem alitsü paisa ayongzük.

OLONG PAITEP # 5909

1		2		3		4	5			
				6						7
		8								
9				10		11				
			12					13		
						14				
16						17				

TIPILEN		LANGTSÜNGLEN	
1. Nisung jenti	- (5)	1. Tenük telong	- (9)
4. Tsük rudenba	- (5)	2. Committee dang ajar	- (5)
6. Temzüng tesashi	- (5)	3. Yagi ki okdoker	- (7)
8. S _ _ _ i	- (3)	5. Yim lenmang	- (5)
9. Nisung telemsa	- (3)	7. Temoatsü keter meyipa aruba	- (9)
10. Anogoshi	- (4)	11. Kanga junga menemba	- (7)
12. Ajanga aor	- (4)	12. Majinü	- (5)
13. Tsük rizüngdak	- (3)	13. Tzüma nung senzüba	- (5)
14. Tebang nungi adokba	- (3)		
16. Süngdong tatembangtiba	- (5)		
17. Meputep	- (5)		

OLONG PAITEP # 5908 TELANGZÜBA

TIPILEN :		LANGTSÜNGLEN :	
1. Telok, 4. Aluru, 6. Ozüng, 8. Emk,		1. Tenükjang, 2. Luden, 3. Kloktsü,	
9. Kin, 10. Teti, 12. Süir, 13. Jen,		5. Lenti, 7. Tajangzük, 11. Teronem,	
14. Ola, 16. Talak, 17. Mazük.		12. Sempa, 13. Jahaz.	

ALOKBA TEBUTSÜI KANGA ARURTSÜR

Tebutsü - Office junga melapokdaksür, sorkar mapa nung inyakterem sen lenmang aika nempanga yutsü, külen ano pension alurtem ita sen mali den, pension sena mangur, business, contractortema Bill kecha magütsür, meimchir timtemteba ya nai Ministertem, Department nung tekolak purtem dang kecha magütsütsü shioka yutsü-a ta kanga dang jashiteprako-ti.

Ano naisa School ajak shibanga yutsü, online nung dang tanurtema exam agütsüdaksür, ano tanurtem schoolibo marudaksür ser nung feebo ajak agiang ta naisa tesayurtem dang ashia-a ta tsürapurtem ne dang kangasa jashiteper.

Ano külen naisa Govt. dang ABAM dang sentep malitsü, lokti senden kecha malitsü, tasüdaki shianga maotsü, kibok sem-a maotsü ta nai tasa tamajung shir meimchir ne dang kanga mepelai jembeteper, ni joko mena meliteti akseter.

Ano aienlen senzütepertemia yamai jembia angashioga, Taxi para, Auto para aika dang meshiang kechiba süra dang ya lockdown mapangji kecha masü ta naisa ne pang jagi drivertem dang oji shioktsür yamaji dang gari para aakadang meshira ta meimchirtemi naji shisa chidar no!

Ano ajiangma vaccine agiba ya, meimchirtem taginer maginer ajak agitsü PM Modiba dang naisa shioka yutsür maginertema rataseta tsübuseta agidaksür, ano govt mapa inyaktertembo magi nungbo ita sena magütsütsü ta item ajak ya ne mapa ta meimchir ajaki jembiteptar " Na ya taochi maka mapa dang inyaker ".

Alokba : Ni ya "Corona Virus-a Süngto"
Tebutsü : Oh Alok!!

Lilir : Asangla, Dimapur.

AO OSHI ANGAZÜKDAK:

TANÜ ANGAZÜKTSÜBA OJANG



Kongpet

(v) an tepongi junga mekongtetba (could not properly crow)

* An tepongi **kongpet** ama asenokia o jembipeter.

Kongra

(v) temang nung shi ajema akümba (skinny)

* Ni shirangba agi kanga **kongra** aküm

NAI-A YA METETTER MA?

AUGUST 18' NÜ ASOR TONGTIBANG NISUNG KAR:

- 7th Peshwa of the Maratha empire Baji Rao I (1700)
- Explorer Meriwether Lewis (1774)
- Cosmetics businessman Max Factor (1904)
- Actor Shelley Winters (1920)
- Former first lady Rosalynn Carter (1927)
- Indian Politician Nirmala Sitharaman (1959)
- Film director Roman Polanski (1933)
- Olympic gold medal winning decathlete Rafer Johnson (1935)
- Actor Robert Redford (1936)
- Actor Patrick Swayze (1952)
- Actor Madeleine Stowe (1958)
- Singer Daler Mehndi (1967)
- Actor Edward Norton (1969)
- Model Frances Bean Cobain (1992)



Frances Bean Cobain

TANÜBO NAI LANGZÜANG

Q. Koba küm Indian Regional Navigation Satellite System mezüng khaketa yok?

- A.2012 B.2013 C.2014 D.2015

_____ (Taruba adok nung onoki langzüsü)

YASHIADOK TELANGZÜBA : John F. Kennedy

SUDOKU # 5950

TELANGZUBA # 5951

2		8	6	4					3	9	1	8	2	4	6	5	7	
5	3	6	9					7		2	5	8	6	7	1	4	3	9
	4	9	2					1		7	4	6	3	5	9	1	2	8
7						3	6			1	2	4	5	8	6	7	9	3
2			5		8					6	8	3	4	9	7	2	1	5
6		7		3						9	7	5	1	3	2	8	6	4
				2	8	5				8	1	7	9	6	3	5	4	2
8								3		5	6	9	2	4	8	3	7	1
5	3	1	7		2	6				4	3	2	7	1	5	9	8	6

OJANG LUTEP # 5495

- EIP :
- NDAG :
- SÜAGIT :
- EMBILA :
- MEERRUMUA :
- KDAINYANG :
- ENAIB :
- MENTEEN :
- ATSMENÜSA :
- MEAKÜR :

OJANG LUTEP TELANGZÜBA # 5494

**TESEM KAR NUNGBO Temoatsü AJURUR MASÜ
TIMTEM LENDONGANG AJURUTSÜSA TIATSÜR**

TAN HOPTA ATEMA - KOMA SÜLA ?

Q. Clean election takok angutsü atema voter shia dangi "ni' vote mayoktsü" ta sign südaktsüyonga Signature campaign sentong ka agia ao nunga koma süla ?

Kabul nungi India nung diplomat 120 dak tema anir aruogo



Mepetmesü adoker aliba linük Afghanistan nungi India nungertem Indian Airforce indang C-17 tayimtsü nung Jamnagar tonga aruba sülen tangokba noksa nung angur.

New Delhi, Luroi/August 17 (Agencies): Afghanistan dangi India ambassador Rudrendra Tandon, ketdangsurtem aser osangbenertem densema Mongolbarnü India nung 100 dak tema Kabul nungi New Delhi tonga aruogo. Gujarat kübok Jamnagar tesem atongba sülen iba tayimtsü 1:30 nung New Delhi tonga aru, ta ketdangsur kati ashi.

C-17 tayimtsü nung India nung ketdangsurtem tanabuba telok anir Jamnagar kübok IAF airbase 11:15 nung tonga aru, ta ketdangsurisa ashi. "Nenoki onok pelashishia agizükba ajanga onok dak kongshio. Tensa majungba mapang ka nung Indian Air Force-i onok anir aruba atema kanga pelar," ta Tandon-i Jamnagar tonger ashiba ANI sangdong ka ajanga metetdaksü.

ANI-i tweet asüba video nung tatimtsü nung anir arurtemi bus ka nung mener "Bharat Mata Ki Jai" aser "Vande Mataram" ta yimyim ayimba nguogo. Ghonda 24 tashi sensaksemba sülen item ketdangsurtem anir aruogo.

"Tayimtsü nung arurtem ajak nem chiyongtsü agütsüsü aser

parnok talidaki anir aotsü," ta Gujarat minister of state for food and civil supply Dharmendrasinh Jadeja-i ashi. Jadeja aser Jamnagar mayor na tayimtsü manen tsüngda Jamnagar airbase tonga orr liasü.

Gujarat sorkari sandong ka ajanga, Taliban-i Afghanistan atsüngba sülen iba linük nung sabanga aliba India nungertem linüki meyipa anir arutsü atema Ato Kilonser Narendra Modi-i anepaludar, ta ashiba PTI sangdong ka ajanga metetdaksü.

IAF tayimtsü ya air traffic control achaayanga aliba US forces teyari ajanga Hamid Karzai International Airport nungi 8:00 ako nung apuso. India tang Kabul nungi civilian tem anintsü atema US forces temelaba atadar. India nung mezüngbuba telok Air India tayimtsü ka nung Deobarnü anir aru.

Indian ministry of external affairs (MEA) aser security ketdangsurtemi Hombarnü nungi tenzüka India nungertem Kabul airport nung anidendar. Kabul nung inyakyim mebeteti aliba mapang Kabul nung Indian mission nungi international

airport-i aoba lenmang nung Taliban aser tanga kiralongrartemi nüka aliba check post tem nung parnok den angatetteper India nungertem anidendar. India-i C-17 tayimtsü ana stand-by nung yua lir, ajita asünungdang US-i temelaba agütsüba sülen ketdangsurtem takaratiba nung anintettsü.

Kabul nung amendaker aliba source temi ashiba agi, HKI airport ya Turkey nung sepaitemi achaayangtsü ta nangzükteper liasü saka inyakyim nung kanga mangmangtepa ajanga parnok atsüngin. Local staff temi ATC aser tanga jenjangtem toktsüba den air traffic services achaayangtsü atema Taliban puri kecha meteta maliba mapang ka nung US-i iba airport achaayangtsüsa aküm.

HKI airport nung mepetmesü tulu adokba sülen US-i Hombarnü Kabul nungi civilian tayimtsü ka danga meyoktsü telemteba agi aser military tayimtsü dang senzüdaksütsü telemteba agia liasü. HKI airport ya civilian tayimtsü atema lapoktsüba sülen India nungertem tanungbatem anir arutsü.

Mamata-i nongloktsüba mapa abentsü: Sushmita Dev

New Delhi, Luroi/August 17 (Agencies): Taoba Congress lenir Sushmita Dev-i Mongolbarnü, la jeli sentong mesera tenangzüktepa kecha meyaglui Trinamool Congress nung aden aser party tir aser West Bengal chief minister Mamata Banerjee-i la nem kecha mapa agütsüdir aji abentsü ta shiogo.

Dev, shiba Congress women's wing tekolakba liasü, la Hombarnü nü Kolkata nung party TMC lenir Abhishek Banerjee aser Derek O'Brien matsüngda party nung aden.

"TMC nung adenba ajanga kü tangatetba aser tebilemdangba memelenshir. Ni TMC nung jeli sentong mesera tenangzüktepa kecha meyaglui denogo aser Mamata Banerjee-i lemzüktsüba mapa kechi südir

süaka abentsü," ta Dev-i osangbenertem dang ashi.

Dev ya taoba mapang MP aser Congress party otongdar liasü. Ano la All India Mahila Congress tekolakba liasü.

Lai Congress party toktsüba shiti Congress tir Sonia Gandhi nem agüja liasü, ajisüaka party toktsüba kuli kecha magütsü ta source kati ashi.

"Yimden yimsüsüba nung ajemoker küm 30 inyaka aruba mapag ni Congress lenirtem dang kecha makhang," ta Dev-i ashi.

Dev shibai Congress party toktsüba indang telangzüba kecha magütsü lai, Congress lenir Rahul Gandhi aser Abhishek Banerjee na medemdangtsüji tai lir ta ashi.

"Asenok shingaia tarutsü mejangja. Rahul Gandhi aser Abhishek Banerjee na

longjemba mapang tesüngmangtsü atalokba nenoki angutsü," ta lai ashi.

"Ni Congress den mapang talangka sendaktepa aruogo aser ni resignation shiti nung ajak zülutsüogo. Ni Congress nung maongka aika nguogo aser kü nem nongloktsüba mapa ajak takok ngua inyaksü merangogo. Nisung aikati kü dangi call asütsü merang saka ni azünga maliasü. August 15 nü ni Congress nem resignation shiti agütsüogo," ta Dev-i ashi.

Mamata Banerjee tenüng sanga Dev-i, "Ni tang mezüngbuba TMC office-i arur. Mamata Di (Mamata Banerjee) ya kü nükrangtong lir aser lai ni party nung adentsü atema agizükba atema kanga pelar," ta ashi.

(Maneni tapak 10 nung...)

SC-i Centre dang 10 nü tsüngda Tribunals nung nisung shimtsü tuyu

New Delhi, August 17 (Agencies): Hombarnü Supreme Court-i Centre sorkari tribunals menden tazüng nung nisung meshimokba atema Centre sorkar dang mepelaba metetdaksü;

Selection Committee-i item menden nung nisung shimoktsü benoka liasü saka sorkari yamaji meinyak. Supreme Court-isa Parliament nung o junga melemtepi Tribunals Reforms Bill, 2021 agizükba atema Centre arrtsü.

Supreme Court-i Centre nem ano maongka agüja anogo 10 nü tsüngda selection committee-i benokba ama Tribunals nung nisung shimoktsü tuyu.

Chief Justice of India (CJI), Nuthalapati Venkata Ramana-

i aniba bench-i sorkari Tribunals nung nisung meshimokba atema mepelaba metetdaksü.

SC-isa Centre dang, anogo ter tsüngda nisung meshimokra Court-i tim teinyaksü inyaksü, ta metetdaksüogo.

Centre atema jembitsür Solicitor General (SG), Tushar Mehta-i SC dang, Central Administrative Tribunal (CAT) nung nisung shimokdar aser tanüngbatemji tekaraba nung inyaksü, ta ashi.

August 3 nü Lok Sabha nung Tribunals Reforms Bill, 2021 ya agizüka liasü. Iba ozüng ajanga tribunals aika anentsü aser Commercial Court mesüra high court nung indang-indanga ken o tem benoktsü atema inyakyim latettsü.

Uttarakhand AAP CM candidate asütsü Kothiyal shim: Kejriwal



Delhi Chief Minister Arvind Kijriwal aser Uttarakhand election atema chief ministerial candidate, retired Colonel Ajay Kothiyal na Dehradun nung 'Devbhoomi Sankalp Yatra,' Sentong agiba mapang tangokba noksa nung angur.

New Delhi, Luroi/August 17 (Agencies): 2022 küm agitsü aliba Uttarakhand Assembly election atema Aam Aadmi Party's (AAP) chief ministerial candidate ji retired colonel Ajay Kothiyal asütsü. AAP convener aser Delhi chief minister Arvind Kejriwal shiba tang Dehradun nung oa lir, pai Uttarakhand ya AAP-i, alima ajunga nung prokshia aliba India nungertem atema spiritual capital kümdaksütsü ta ashi. Paisa, sorkar kümtettsü atema AAP nem maongka agütsüra par party-i lanurtem atema mapa balala agütsütsü, ta tenangzükba agütsü.

Kejriwal-isa, state nung yimden yimsüsürtemi lakteter aliba nüburtem nungi parnok tebilemba angadanga sülen party CM asütsü asoshi Kothiyal shimtsü telemteba agi, ta ashi. "Nübutemi yimden yimsüsürtem laktetogo, shirnoki state rongsen ajunga auyar. Parnoki CM asütsü asoshi Army ka aginer, shibai pa indang tenure ya pa ajangzüktsü atema masü saka nüburtem tenzüka tembangdaksütsü," ta pai public rally ka nung ashi.

Hombarnü Kejriwal-i, pai Uttarakhand semdangtsü aser

tongtibang osang ka metetdaksütsü, koba state terenlok asoshi alizük tasen ka asütsü ta ashi.

July ita Uttarakhand semdangba mapang Kejriwal-i, par party nem sorkar kümtettsü atema maongka agütsüra state nung aliba nüburtem nem electricity unit 300 angati agütsütsü ta nangzükba liasü. Uttarakhand nung AAP indang Delhi model of governance indang jembiba mapang, Kejriwal-i, party-i Assembly election kokra school aser health infrastructure nung temelenshi tulu bener arutsütsü, ta ashi.

Taoba mapang AAP-i sangdong ka ajanga, chief minister Tirath Singh Rawat, Gangotri nungi toktepra parnoki Col Ajay Kothiyal iba constituency nungi toktepdaksütsü ta ashi.

"BJP-i taoba küm pongu tsüngda Uttarakhand raksatsüogo. Bypoll nung Gangotri nungi tokteptsü atema party-i kü nem maongka agütsüba atema pelar. Ni Gangotri nung yimsüing aika semdangogo. Nüburtem kanga mepelar. Tangbo nüburtemi akoktsü ta temlung lema bilemer," ta Col Kothiyal-i tweet asü.

US sepaitem anizüker arutsü mapang tajung balaka mali: Joe Biden



Kabul, Luroi/August 17 (Agencies): Afghanistan nungi mitkar tayimtsü amshia diplomats aser civilian tem anizüker aoba maparen Mongulbarnüa inyak, kong Taliban teloki linük yimtiba atsüngdokba sülen nisung meyerijang aika linük yutsür jena aotsü meranga Kabul airport nung adenshia liasü.

Civilian tem adenshiba ajema kumogo, ta airport nung anüolen linük nungi security ketdangsür kati ashi. Anogo ka tejakdang iba tesem nung US mitkar indang tayimtsü ka ayamesoba mapang iba tayimtsü nung sokettsü merangba nisungtem senshidaktsütsü mechi US sepaitemi injang khadoka liasü.

"Kabul international airport nung runway lapoka lir. Tayimtsütem anenba aser ayamesoba ni angu," ta NATO indang civilian representative, Stefano Pontecorvo-i Twitter

nung ashi. Nikongdang tashinung mitkar indang tayimtsü 12 ayamesogo, ta airport nung diplomat kati ashi. Ano Australia aser Poland densema linük balala nungi pei senso aser Afghan nunger külemi mapa inyakertem anizüker aotsü asoshi tayimtsütem arutsü lir.

Taoba küm US sepaitemi tezüngzüktep ka yangluba nung bendanger sepaitem linük yutsür aoba mapang Taliban-i lendong timtem magütsütsü molunga lir.

Küm 20 tejakdang US-i anir linük balala nungi sepaitemi Afghanistan nungi Taliban yimli atsüngdokba sülen hopta ka tsüngta iba telok yagi tanaben linük tesem ajungalen amokbang. US sepaitemi Deobarnü nungi tenzüka Kabul airport ketdangsür, aser Afghanistan nungi ainshitsü asoshi lenmang ajak agi iba

tayimtsü anendak ya dang lir.

Hombarnü tayimtsü timba thinen, kong nisung pongu asü, aser asürtem ya injang agi khasetba asü ajemsetar mejangja.

US mitkar indang tayimtsü ka ali nungi ayamesoa anüngleni yimketa atuba mapang iba tayimtsü nung ayaloka aliba nisung ana tsüka asü, ta osang kar ajanga ashir.

Küm 20 raraba sülen US sepaitem anizüker aotsü asoshi US Tir Joe Biden-i telemteba agiba bukuma pai jembi. Iba rara ya US asoshi talangtiba alitsü, kong sen trillion \$1 dak tema indokogo, ta ashir.

US sepaitem dang tatem makai raratsü asüngdangtsü mesüra pa jakdang Tir inyaksang Donald Trump-i züngzüktepba ama sepaitem anizüker aotsü asoshi telemteba ka agitsüla liasü, ta Biden-i ashi.

"Ni kü telemteba nung temolung lemteta nokdaka lir. Küm 20 sülen US sepaitem anizüker arutsü asoshi mapang tajung balaka mali ta ni anagatet. Iba yongji asenok tang tashi yangi lir," ta Biden-i ashi.

Pa meyong diplomats tem nungia pa aija aliba mapang Taliban-i Afghanistan linük agiba atema pai Afghan yimten yimsüsür linük yutsür jena aoba aser mitkartemi raratsü memolungba aitsü.

Taliban-i Afghanistan nung yimti tulutem ya ita ishika tsüngta nung agitetsü, ta US itdangiter temi shia liasü, saka anogo ishika tsüngta agiadok. United States aser danga linüktemi küm aika training agüja aser hadir balala agüja aruaka tejangraba maliba sorkar meyong sepaitemi par sasa bendanga agütsü.

COVID case ka mechi New Zealand ajunga shibanger

Auckland, Luroi/August 17 (Agencies): Ita trok nung nisung ka dak COVID-19 positive jangjatetba sülen New Zealand nung ajungbena lockdown sangdongogo.

Iba case ya Auckland nung putet, koba nung lockdown ya hopta ka alitsü aser tanüngba linük tesem ajunga asemnü shibangtsü.

Case tasenba ya Delta variant asütsü südi ta bilema ketdangsürtemi maparen balala inyaker, ta ashir.

New Zealand nung nütsüng yongsük shilem 20 shi ang COVID-19 mozü dose anaprong agir lir.

Tzükumlen aliba Coromandel jila, kong tashidak mena alisangi semdanga liasü, iba tesem ya anogo tenet asoshi shibangtsü.

Ozüng tesashitaba "level 4" benoktsü nungdaker, aser yangji tongtipang service tem

dang yutsür school, office aser business ajunga shibangtsü, ta Ato Kilonser Jacinda Ardern-i ashi.

"Iba ama timtem asoshi asenok renema liasü ta ni New Zealand nübur dang ashir.

Taoba mapanga kanga kera aser sashia nokdangba ajanga mapa inyak," ta lai ashi.

Iba tashidak puteta alisang ya arishi küm 58 tain tebur ka lir, shiba dak tashidak ya taoba Brehostibarnü nungi liasü südi, ta amanger.

Tashidak menatepa aotsüsa tesem 23 lir.

Ajungbena lockdown benokba mapang Auckland nung nüburtem supermarket tem nung nungtepa liasü.

Delta variant tetsübu nung telangzüba tesashi agütsütsü nungdaker, aser ajidang masü case tasenba ya arütsü aser quarantine facility den sendaktepa mali.

New Zealand indang Ministry of Health ajanga Hombarnü data sayaba nung tawa linük arütsülen COVID-19 cases putetba ajunga ya Delta variant lir, ta shia lir.

"asenoki iba tashidak ya mazüoktetra kechi tia ajurutsüar asenoki tesem balala nung nguogo. Asenok asoshi maangka ka dang angur," ta Ardern-i linük den television ajanga jembidang ashi.

New Zealand nung iba virus ya takok ngua arütsülen nungi nokdangtet, aser linük balala den arütsü timba tang tashi shibanga lir.

Ajisüaka iba linük nung mozü agütsüba maparen nung ilongba mali, kong nütsüng yongsük shilem 20 dang vaccine dose anaprong agiogo, shilem 33 bo dose ka dang agir lir, ta Our World in Data ajanga ashir.

Japan kübok tesem 7 nung emergency benokogo

Tokyo, Luroi/August 17 (Agencies): Japan sorkari Mongolbarnü coronavirus tashidak (Covid-19) mechi state of emergency tesem tenet nung benokba sangdongogo. Paralympic Games asayatsü hopta ka dang anunga lia Japan nung tang covid tashidak kanga kara menatepyonga odar aser emergency benokba tesem tenet rongnung Tochigi, Gunma aser Shizuoka-a densema lir. State of emergency ya September 12 nü tashi benoktsü akok, ta ketdangsürtemi metetdaksü.

Tokyo, Osaka, Okinawa aser tanga tesem asem nung emergency benoka lir aser item tesemtem nung emergency benoka aliba August 31 nü tembangtsü liasü. Tang tenokdangba agütsür aliba tesem 13 kümogo.

Tenokdangba agütsür alibatem rongnung, restaurant aser bar tem nung yi ayoktsü memelar aser aonung 8:00 ako nungbo shibangtsü tetuyuba agütsüogo. Sorkari, shopping mall aser departmental store tem dang mapang ka nung nisung tatakzük ka dang shishidaktsütsü atema tetuyuba agütsütsü imlar.

"Japan nung taoba mapang kodanga majangshidangba tang tashidak kanga kara menatepyonga odar," ta Japan indang Covid-19 response


minister Yasutoshi Nishimura-i Mongolbarnü expert panel ka dang ashiba den anogoshi tashidak agi kanga mejungi kongshirtem tali tali küma odar, ta ashi.

Tanga linüktem den medemdanra Japan nung Covid-19 tashidak menar kanga aikabo masü saka Ato Kilonser Yoshihide Suga-i aniba sorkari Delta variant agi animesoba tashidak ya maziükteti arudar.

News agency Bloomberg, sangdong ka ajanga ashiba agi, tenokdangba balala agütsür liaka nüburtemi iba sülen manidaker. Senchi achitsü amokmerenaka bar aser restaurant tem mapang shidak nung meshibanger aser yi maneni yokdar. Nüburtem nungdak makaba nung pei ki toktsür aoer aser sorkar ketdangsürtemi tang tashi nung temerenshi kecha agüja mali.

Ato Kilonser Suga-i, linük ajunga mokdanga mayutsü ta shiogo aser tensa tajungba küma aotsü asoshi vaccine dak metaloker aliba lemsatepogo. Bloomberg-isa, Hombarnü tashi nung Japan nung nütsünyongsük shilem 37 dak tema vaccine dose anaprongla agiogo aser sorkari vaccine aginertem ajak nem November ita tashi nungbo vaccine agütsütsü sentong yangludar, ta metetdaksü.

UK health regulator-i tanurtem nem Moderna Covid-19 vaccine agütsütsü mela



London, Luroi/August 17 (Agencies): Britain indang health regulator-i, tanur arishi küm 12 nungi 17 tsüngda alirtem nem Moderna Inc indang Covid-19 vaccine agütsütsü temelaba agütsüogo, ta sangdong ka ajanga metetdaksü.

Pfizer Inc aser German partner BioNTech indang Covid-19 vaccine, tanurtem nem agütsütsü asoshi temelaba agütsüba sülen ita ana dak tema lir tang tanur arishi küm 12 nungi 17 tsüngda alirtem nem BioNTech indang Covid-19 vaccine agütsütsü asoshi temelaba agütsüogo.

European regulator-i taküm July ita Moderna indang vaccine

ya tanur tainlonglongtem nem agütsütsü asoshi benokdang aser US nungi temelaba ataa liasü. Iba vaccine ya tang UK nung arishi küm 18 temapurtem nem agütsütsü atema temelaba agütsür lir.

Britain indang Joint Committee on Vaccination and Immunisation (JCVI)-i August 4 nü arishi küm 16 aser 17 pur nem Pfizer indang Covid-19 vaccine mezüngbuba dose agütsütsü asoshi temelaba agüja liasü. September ita school metenzük tsüngda iba vaccine agütsütsü temelaba agütsü.

Tang JCVI-i iba vaccine ya tanurtem nem agütsütsü magütsütsü, iba indang telemteba ka agütsü.

Kohima nung anti-rabies vaccination camp agiogo

Kohima, Luroi/August 17, 2021 (TYO): India nüjiso ngur küm 75 ajungba benjongmung nungtem nung, Deobarnü (15.08.2021) Department of A.H & Veterinary Services kübok District Chief Veterinary Office Kohima-i Veterinary Hospital, Kohima nung taa magii 'Anti-Rabies Vaccination den repsema Animal Health Camp agia liasü.

Iba Camp agiba mapang kiset shiruru metsüba kibur aiakti shilem tajung agiogo. Rabies tashidak anema azü (dog) 253 nem rabies vaccine agütsüogo aser tanga kiset shiruru 47 shi anepalua liasü, ta VAS, Vety. Dispensary, Chiephobozou, Kohima, Dr. Vikuolie Mezhatso-i metetdaksü.

Mon nung Smoke Free District Headquarter Campaign tenzüksüogo



Mon, Luroi/August 17, 2021: Deputy Commissioner, Thavaseelan K, IAS-i Mon nung 'Smoke Free District Headquarter Campaign' tenzüksüba mapang tangokba noksa ka yangi angur.

Mon, Luroi/August 17, 2021 (TYO): Hombarnü, Mon DC Office, Conference Room nung, Deputy Commissioner, Thavaseelan K, IAS-i 'Smoke Free District Headquarter Campaign' tenzüksüogo. District Level Coordination Committee senden agiba mapang iba campaign tenzüksüba liasü, ta sangdong ajanga metetdaksü.

Iba sentong nung, Thavaseelan-i, "2nd Hand Smoking" (Passive smoking) ajanga nisung (moko machir) dak timtem balala adokba indang tekümdangstütem nübur dang metetdaksütsüla, ta ashi.

Iba campaign ajanga, moko achirtemi pei kidang/kibong nung adianu/chirnurtem timtemdaksüba indang yimdangi arua kümdangshitsü imlar, ta pai ashi.

COPTA 2003 indang Section 4 nung shia aliba ama, moko achiba ya mapa tamajung inyakba den sako ta nübur dang tekümdangstü osang sangoktsütsüla, ta DC-i telok dang metetdaksü.

Nodal Officer, NTCP Mon, Dr. I Simon Sumi-i, iba Campaign indang nükjidong aser asalentong tem metetdakja liasü, kong moko achiba aser lokti kazüba tesem nung moko achiba ajanga tangar nem (moko machir) timtem agütsüba indang tekümdangstü, COPTA 2003 indang Section 4 tetuyubatem nübur dang metetdaksü, kong moko achiba nokdang aser lokti kazüba tesem nung moko achiba atema temerenshi agütsütsü latetja lir aser moko achiba yimya indoktsü asoshi nüburtem ajungshitsü.

Iba Campaign atema asalentong balala - HoDs aser District Anti-Tobacco Squads ajak iba campaign indang meteta/rajema lidaktsütsü, mapang shia enforcement drive agütsü; NGOs, Lokti Tentet balala, Arogo aser School tem Campaign Ambassador ama shimtsü, ta pai telok dang metetdaksü.

Iba Campaign dak sendakba nung leaflets/pamphlets, moko achiba ajanga

temang nung timtem adokba aser temerenshi aliba video tem yanglua sayutsü; Office, Rejutem aser jila kübok tongtibang tesem ajunga nung moko machitsü asoshi signboard yutsütsü aser Campaign Ambassador atema school tetemjen shimtsü asoshi Committee-i tatsü talang ajak asadangshia olemtepogo.

Tang, Mon jila kübok School 11 nung 'tobacco free' sangdong lir asünung, District tesem ajunga nung shisaliok reju (School - Educational Institution) ajak tobacco free' kümtsütsü atema Committee-isa olemtepa liasü.

'Smoke Free District Headquarter Campaign' tenzüksüba sentong nung, District Consultant, NTCP Mon, E. Nyeamyang Konyak-i tepela anküp o jembi. St. Joseph's School, Mon nem 'Tobacco Free School Certificate' ka agütsü.

Iba sentong nung, Department balala nungi ketdangsurtem dena liasü, ta kasa sangdong nung shia lir.

OFFICE OF THE DIPHUPAR AO SENSO TELONGJEM (DAST)

TENÜNGSANG AGÜTSÜR



Sd/-
T. Maong Aier
President (DAST)

Chuchuyimlang yimtsüng nungi Asür Tsuknong'er jabaso **Wb. Tamsuyangba Ao**, UBSI of CP Dimapur ajanga Nagaland nungi 2021 küm atema "**Union Home Minister's Medal for Excellence in Investigation**" award aser iba den külemi Governor's Gold Medal anguba atema Diphupar Ao Senso Telongjem (DAST) ajanga nümatanga pa nem tenüngsang agütsür.

Lokti nem tenüng tajung bener arutsüba atema DAST-isa pelaba lemsateper aser State/nübur tenzüksüba tsütsü pai bendanga agüja inyakba onoki pelashishia agizüker.

Sd/-
I. Imti Imsong
Gen. Secy (DAST)

SANGDONGER

Mrs. Tamsüsenla D/o Lt. Tsükiwati, Süngratsü Village (Present Address, Anentsübu Sector, Mokokchung), lai kija aser lokti balala dang sen apua lira, senmanger, adianu aser kinungertemi memetet. Ano tang nungi kija aser lokti kari danga la nem sentem agütsüra mesüra shishilembatep süra pei khuret asütsü ta iba zülü ajanga sangdonger.

Senmanger, adianu aser kinungertem tenüng nung: -
Akumtoshi

MULUNGNEŃ O



Asür T. Medem Longchar (Longkhum)
20-10-1955 - 12-08-2021

Temeim asür wabong T. Medem Longchar (Longkhum), iba lima nungi pilar onok mangyim jashi tia nung alidang, shirnokisa onok dang temeim mapa tajung sayuogo, nenok ajak dang pelaba lemsateper. Ozü-i nenok ajak dangi tsüngdong arua tepela meshiteter, saka Tulusang Tsüngremi nenok nem lepa moajangni ta ozü tamang sarasadem.

Temeim kinungtsü, chirnur aser semchirtem

DIMAPUR AREA CHUCHUYIMLANG SENSO TELONGJEM KONANG ASER TETUSHI

1. **Shri. WABANG JAMIR, IPS IGP (INT) Gujarat**
S/o M.CHUBA JAMIR & IMKONGLEMLA PONGEN (CHUCHUYIMLANG)
Award:- President's Police Medal for Meritorious Service



2. **Shri. TEMSUYANGBA, UBSI (C.P Dimapur)**
S/o Lt.TSUKNUNG JAMIR & ODILA PONGEN (CHUCHUYIMLANG)
Award:- a) Union Home Minister's Award for Excellence in Investigation 2021
b) Governor's Gold Medal



3. **Shri. TEMSU LKR (Horticulture Officer) Dimapur**
S/o S.CHUBA LKR & LIMALA PONGEN (CHUCHUYIMLANG)
Award:- Governor's Commendation Certificate



Nenoki mapa tajung inyaktetba yong yimer yimsanger nem konang bener arutsü nung kanga pelar. Kodaker Tsüngremi nür wadang nung tali azükaru lidakjangma.

Sd/-
I. SUNGIT LKR
President, DACST

Sd/-
N. TEMJEN PONGEN
Asst. General Secretary, DACST

Mulungnen O



Asür Takutoshi Jamir (Salulamang)
Aso : 4th May 1953 - Asü : 12th August 2021

Onoki teti meima aliba asür obala Takutoshi Jamir, mapang tatsüka shiranga alidang nungi asünü tashi shirnokisa aria bilema onok mangyim jashi nung alidang kija, kinunger, medemer, Tentet balala, Arogo, shinokisa onok tamang tia nung alidang molungtsentsü ajak agi shi aser tanela nung yariba den rongsen agi yariogo nenok ajak dang kangasa pelaba metetdaksür.

Ozüi nenok dang tsüngdong arua tepela meshiteter saka tulusang Tsüngremi nenok nem molamoshia moajang ta onoki sarasademtsür.

Temeim Kinungtsü, Jalatem, Semchisemnur aser Anükapang.



New Delhi, Luroi/August 17, 2021: Mongolbarnü, Union Minister of Youth Affairs & Sports, Anurag Thakur-i World Youth Archery Championship nung takok angur India team den külemi tangokba noksa ka yangi angur. Iba asayamung nung takok tulu ngua India nem tenüng tajung bener arutsüba asoshi Thakur-i team nem tenüngsang agütsüogo. Wrocław, Poland nung ayongba World Youth Archery Championship nung India team-i gold medal 8, silver medal 2 aser bronze 5 densema medal 15 angu.

Roma-i Chelsea forward Tammy Abraham alizükogo

Luroi/August 17, 2021 (Agencies): Mongolbarnü, Italy indang football club Roma-i euro million 40 (\$47 million) yong Chelsea nungi forward asayar Tammy Abraham alizükogo.

Roma club nung Edin Džeko melena Abraham anioker asütsü. Taoba hopta, Edin-i Serie A takok angur telok Inter Milan den asayatsü atema Roma club toktsü.

"Club kati nü nübu aginüba/nüngdakba mapang, nü molung nung tejembiba ka aiter aser Roma puri parnok tebilemba kü den lemsatepogo," ta Serie A club - Roma den küm pungo atema tenangzüktep agisang Abraham-i ashi.

Chelsea nung asayaba mapang, Abraham-i shilem

tajung agia pa jenjang yanglua liasü. Chelsea atema asaya 82 nung shilem agiba mapang, pai goal 30 idaktsü. Iba club nung masayadang, Abraham-i Bristol City, Swansea aser Aston Villa atema asayaogo.

Arishi küm 23 tain Abraham, shibai England football team atema trokben asayaogo aser Chelsea-i taoba season Champions League takok angutsü asoshi pai shilem tulu agiogo.

Taoba season Serie A nung Roma jenjang tenetbuba nung tembang aser 2008 küm Italian Cup takok ngur külen nungi par teloki asayamung ka danga koka mali. Tang, Roma team nung José Mourinho coach inyakdar.

"Title aser takok marok atema tokteptsü asoshi Roma dak tashi lir. Tongtibang asayamung nung shilem agia takok marok balala anguba ajangshidangogo aser item tetoktepba nung tanaben shilem agitsü yongyar. Ajasünung, team-i (Roma) iba jenjang ajangzükteptsü asoshi kü dak aketba sempet tajungtiba amshia club yaritsü molunga lir aser team tajung ka ama Roma nem iba jenjang tongtetdaksüner," ta Abraham-i ashi.

Tang, Roma club nung asayar tasen anioker/alizüker rongnung Abraham pezübuba asütsü. Pa marudang, Roma-i goalkeeper Rui Patrício, forward Eldor Shomurodov aser defender Matías Viña nungner anioka liasü.

Shane Bond coach pezübuba ama shimogo



New Delhi, Luroi/August 17, 2021 (Agencies): Tanüngba IPL nung Mumbai Indians den külemi shilem agiba sülen, UAE nung aruya aliba T20 World Cup asayamung atema, taoba mapang fast bowler, Shane Bond-i coach pezübuba ama külem New Zealand team nung adentsü.

T20 World Cup temer sülen, India den T20 International series asaya asem atema Bond-i New Zealand team yaritsü.

New Zealand head coach, Gary Stead-i ashiba agi, Bond ama iba saisapong wadang tsütsü tajangshiba jenti alir ka aniokba ya tuluka.

"Taoba mapang nunga Shane Bond-i onok (New Zealand) den külemi asayaogo aser pai onok tebilemba angateta dang lir," ta Stead-i ashi.

"T20 World Cup masayadang, UAE nung (IPL) pa adenba ajanga, iba tetoktepba asayamung nung pai tasa/yimya tasen kar angazüktsü imlar. Pa adenba ajanga, bowler tem kanga ajangzüktsü, kong asayamung mapang bowler tem asalentong nung pai nungittsü. Iba ama asalentong yanglua asaya nungang, onoki tangar team menepa asayatsü," ta pai

shisem. Indian Premier League indang tanüngba asayatem atema, arishi küm 46 tain Shane-i bowling coach ama Mumbai Indians den inyaktsü. T20 World Cup masayadang, UAE nung September 19 nungi October 15, 2021 tashi iba asayamung ayongzüktsü terenemba lir.

2012 nungi 2015 küm tashi Bond-i külem New Zealand tebur team indang bowling coach ama inyakogo. Iba sülen, 2019 küm England den T20 series ka nung New Zealand atema Bond-i ano bowling coach ama yariogo.

New Delhi, Luroi/August 17, 2021: Mongolbarnü, Union Minister of Youth Affairs & Sports, Anurag Thakur-i World Youth Archery Championship nung takok angur India team den külemi tangokba noksa ka yangi angur. Iba asayamung nung takok tulu ngua India nem tenüng tajung bener arutsüba asoshi Thakur-i team nem tenüngsang agütsüogo. Wrocław, Poland nung ayongba World Youth Archery Championship nung India team-i gold medal 8, silver medal 2 aser bronze 5 densema medal 15 angu.

T20 World Cup: October 24 nü India aser Pakistan asayatsü

New Delhi, Luroi/August 17, 2021 (Agencies): Oman aser UAE nung October 17, 2021 nungi tenzükta November 14, 2021 tashi T20 World Cup asayatsü terenemba lir. India team-a parnok campaign tenzükta October 24 nü Dubai nung Pakistan den asayatsü lemzüktsüogo.

Mongolbarnü, International Cricket Council (ICC)-i T20 World Cup atema schedule sangdongogo, kong asayamung tenzükta October 17 nü Round 1 - Group B nung asayamung ayonger telok - Oman aser Papua New Guinea asayatsü.

Kasa anogo Group B nungi

Scotland aser Bangladesh na asayatsü. October 23, 2021 nü Abu Dhabi nung Super12 stage tenzüktsü. Iba stage nung Group 1 nungi Australia aser South Africa na asayatsü. Iba sülen, Dubai nung England aser West Indies asayatsü.

October 24 aonung 6:00 ako nungi Dubai kübok Group 2 nung India aser Pakistan tsüngda mezüng asayatsü, ta ICC sangdong ajanga metetdaksü.

Anogo ishika sülen, October 31 nü kasa tesem (Dubai) nung Virat Kohli'er teloki New Zealand team den asayatsü. Ano November 3 nü Afghanistan den asayar sülen mezüng round nung

Group B nung takok angur team den November 5 nü India asayatsü.

November 8 nü India indang final group match ya Group A nungi Round 1 qualifier nung tanabuba jenjang tongteta alir team den tokteptsü.

Knockout stage November 10 nungi tenzüktsü aser Abu Dhabi nung mezüng semi final asayatsü renema lir. November 11 nü Dubai nung tanabuba semifinal asayatsü.

Semi final ana nungi takoker team ana tsüngda November 14, 2021 (Deobarnü) aonung 6:00 ako nungi Dubai nung T20 World Cup final asayatsü.

*** ICC T20 World Cup asayatem: asaya mapang ajak IST asütsü ***

October 17 : Oman vs Papua New Guinea, Group B, 3:30 PM, Al Amerat	Sharjah
October 18 : Ireland vs Netherlands, Group A, 3:30 PM, Abu Dhabi	Afghanistan vs Pakistan, Super 12 Group 2, 7:30 PM, Dubai
October 19 : Scotland vs Papua New Guinea, Group B, 3:30 PM, Al Amerat	October 30 : South Africa vs A1, Super 12 Group 1, 3:30 PM, Sharjah
October 20 : Namibia vs Netherlands, Group A, 3:30 PM, Abu Dhabi	England vs Australia, Super 12 Group 1, 7:30 PM, Dubai
October 21 : Bangladesh vs Papua New Guinea, Group B, 3:30 PM, Al Amerat	October 31 : Afghanistan vs A2, Super 12 Group 2, 3:30 PM, Abu Dhabi
October 22 : Namibia vs Ireland, Group A, 3:30 PM, Sharjah	November 01 : England vs A1, Super 12 Group 1, 7:30 PM, Sharjah
October 23 : Australia vs South Africa, Super 12 Group 1, 3:30 PM, Abu Dhabi	November 02 : South Africa vs B2, Super 12 Group 1, 3:30 PM, Abu Dhabi
October 24 : A1 vs B2, Super 12 Group 1, 3:30 PM, Sharjah	November 03 : New Zealand vs B1, Super 12 Group 2, 3:30 PM, Dubai
October 25 : Afghanistan vs B1, Super 12 Group 2, 7:30 PM, Sharjah	November 04 : Australia vs B2, Super 12 Group 1, 3:30 PM, Dubai
October 26 : South Africa vs West Indies, Super 12 Group 1, 3:30 PM, Dubai	November 05 : New Zealand vs A2, Super 12 Group 2, 3:30 PM, Sharjah
October 27 : England vs B2, Super 12 Group 1, 3:30 PM, Abu Dhabi	November 06 : Australia vs West Indies, Super 12 Group 1, 3:30 PM, Abu Dhabi
October 28 : Australia vs A1, Super 12 Group 1, 7:30 PM, Dubai	November 07 : New Zealand vs Afghanistan, Super 12 Group 2, 3:30 PM, Abu Dhabi
October 29 : West Indies vs B2, Super 12 Group 1, 3:30 PM, Dubai	November 08 : India vs A2, Super 12 Group 2, 7:30 PM, Dubai
	November 10 : TBC vs TBC, 1st Semi-Final, 7:30 PM, Abu Dhabi
	November 11 : TBC vs TBC, 2nd Semi-Final, 7:30 PM, Dubai
	November 14 : TBC vs TBC, Final, 7:30 PM, Dubai

Mamata-i nongloktsüba... (Tapak 7 nungi...)

"Mamata Banerjee lenisüba nung ni la nükla tashi taitba kümdaktsütsü. Bengal nung Mamata mapa tajung ajanga ni ajungmesor. Bengal sorkari benokba scheme tem aika tenüng asadangtsü langa lir aser Mamata Banerjee dak metoktsü inyaktsü tanüla ka aliba ajaki meteta lir. Mamata Banerjee küna tesendaktep ya yimden yimsüsüba masü saka küna kinunger lir," ta lai ashi.

Dev mesera TMC MP aser national otongdar Derek O'Brien napronglai party nung pa shilem indang kecha mashi saka source balala ajanga, la nem Assam aser Tripura nung mapa tulu agütsütsü ta shiogo,

kong party atsülanga odar. Source balala ajanga ashiba agi, ken o kar nung Dev, Congress lenirtem dang mepelai liasü, kong Citizenship (Amendment) Act densema lir, koba lai party tamendakdak anema pusema aruogo.

Dev-i 2014 küm Assam nung Silchar menden akok aser 2019 küm tsük. Silchar, kong Bengali nungertem timba lir parnoki CAA pusemer, saka Congress-i iba anema nokdakba ajanga la jenjang mejungi aküm.

Source ajangsa, la aliba tesem nung Congress-i CAA ken o achaayangba yimya ajanga la mepelai liasü, ta ashi.

BILEMDANGANG

"Nübu aser rongsen indokba yari tajangzük angutsüla."